

## სიზმრადნახული

ლაჟვარდი იყო სუფთა და ღია,  
მიმზერდა იის ცისფერი თვალი,  
მღეროდა ვიღაც და სამაიას  
ცეკვავდა სამი უცნობი ქალი.

გადავიარე სინათლის ზღვარი  
და უცნაური ვნახე ხატება –  
ჯერ არ მინახავს ქვეყნად ამგვარი  
გასაოცარი გამოცხადება.

სულიერივით დარბოდნენ ხენი,  
ფრინველებს ლხენით ვესროდი ისარს,  
მოჰყავდათ ჩემსკენ ფასკუნჯებს ფრენით  
პირმშვენიერი მნათობი დღისა.

ისე ბრწყინავდა ვერცხლის ხეხილი,  
გაოცდებოდით ფერთამხილველი, –  
ოქროს მთა-ბარი და მთაგრეხილი,  
გამოცხადება გასაკვირველი!

ოქროს გალიებს, ოქროს ზარებით,  
და გალიებში სამოთხის ჩიტებს  
ვუმზერდი, ვიდექ ფერნამკრთალები  
და გრძნეულივით ვუსმენდი კიდეც.

და მერე, როცა მეტოქემ მთვარის  
გადამაფარა სინათლის კალთა, –  
უეცრად გაქრა ზმანება მკრთალი  
განათებული ოცნების კართან.